

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкурентијски савјет

R J E Š E N J E

**po Prijavi namjere koncentracije privrednog subjekta Post International Beteiligungs GmbH,
Beč, Republika Austrija i privrednog subjekta 24-VIP d.o.o., Sarajevo, BiH**

Sarajevo
Maj, 2008. godine



Broj: 01-03-26-005-12-II / 08
Sarajevo, 13.05.2008. godine

Na osnovu člana 25. stav (1) tačka e) člana 42. stav (1) tačka d) člana 43. stav (2), a u skladu s čl. 12., 14., 16. i 18. Zakona o konkurenciji ("Službeni glasnik BiH", broj 48/05 i 76/07), rješavajući po Prijavi namjere koncentracije privrednog subjekta Post International Beteiligungs GmbH, Steinhilgasse 1, 1210 Beč, Republika Austrija i privrednog subjekta 24-VIP d.o.o., Azići 12, 71 000 Sarajevo, zaprimljene pod brojem 01-03-26-005-II/08 dana 08.02.2008. godine, Konkurencijsko vijeće na 66. sjednici održanoj dana 13. 05.2008. godine donijelo je

R J E Š E N j E

1. Ocjenjuje se dopuštenom koncentracija na tržištu dostave paketa po principu od vrata do vrata u Bosni i Hercegovini, koja će nastati sticanjem kontrole kupovinom većine udjela u osnovnom kapitalu privrednog subjekta 24-VIP Express Logistics Services d.o.o. Azići 12, 71000 Sarajevo od strane privrednog subjekta Post International Beteiligungs GmbH, Steinhilgasse 1, 1210 Beč, Republika Austrija.
2. Ovo Rješenje je konačno i upisuje se u Registar koncentracija.
3. Ovo Rješenje bit će objavljeno u "Službenom glasniku BiH", službenim glasilima entiteta i Brčko Distrikta Bosne i Hercegovine.

O b r a z l o ž e n j e

Privredni subjekt Post International Beteiligungs GmbH, Steinhilgasse 1, 1210 Beč, Republika Austrija (u daljem tekstu: Post International ili podnosilac Prijave), putem ovlaštenog zastupnika, advokata Marić Branka, Mehmeda Spahe 24, 71 000 Sarajevo, je podnio Konkurencijskom vijeću Bosne i Hercegovine Prijavu namjere koncentracije (u daljem tekstu: Prijava), kojom podnosilac Prijave želi kupovinom većine udjela u osnovnom kapitalu steći 100% vlasništvo nad novonastalim privrednim subjektom 24-VIP ExpressLogistics Services Azići 12, 71 000 Sarajevo.

Uvidom u dostavljenu Prijavu, Konkurencijsko vijeće je utvrdilo da ista nije potpuna u smislu člana 30. Zakona o konkurenciji ("Službeni glasnik BiH" broj 48/05 i 76/07) (u daljem tekstu: Zakon) i čl. 8. i 10. Odluke o načinu podnošenja prijave i kriterijima za ocjenu koncentracije privrednih subjekata ("Službeni glasnik BiH", broj 95/06), te je u skladu sa članom 31. Zakona, zatražilo dopunu Prijave, dopisom broj 01-03-26-005-1-II/08, dana 25.02.2008. i dopisom broj 01-03-26-005-6-II/08 dana 08.04.2008.godine.

Podnosilac Prijave je u skladu sa zahtjevima Konkurencijskog vijeća dopunio Prijavu dopisom broj 01-03-26-005-2-II/08, dana 29.02.2008.godine, dopisom broj 01-03-26-005-3-II/08 dana 19.03.2008., dopisom broj 01-03-26-005-4- II/08, dana 19.03.2008, dopisom broj 01-03-26-

005-5-II/08, dana 14.03.2008., dopisom broj 01-03-26-005-7- II/08, dana 09.04.2008. i dopisom broj 01-03-26-005-8-II/08, dana 10.04.2008.godine.

Prijemom tražene dokumentacije Konkurencijsko vijeće je utvrdilo da je Prijava kompletna i izdalo je Potvrdu o prijemu kompletne i uredne Prijave, u skladu sa članom 30. stavom (3) Zakona, dana 23.04.2008.godine pod brojem 01-03-26-005-10- II/08.

Podnosilac Prijave je naveo, u smislu člana 30.stav (2) Zakona, da nema obavezu podnijeti zahtjev za ocjenu koncentracije, ni jednom drugom tijelu ovlaštenom za ocjenu koncentracije, izvan teritorije Bosne i Hercegovine.

Konkurencijsko vijeće je u postupku ocjene Prijave utvrdilo slijedeće činjenice:

Prijava je podnesena u predviđenom vremenskom roku, u smislu člana 16.stav (1) Zakona.

1. Učesnici koncentracije

Učesnici koncentracije su privredni subjekti Post International Beteiligungs GmbH, Steinhilgasse 1, 1210 Beč, Austrija i 24-VIP d.o.o., Azići 12, 71 000 Sarajevo.

1.1. Privredni subjekt Post International Beteiligungs GmbH, Republika Austrija

Privredni subjekt Post International Beteiligungs GmbH, Steinhilgasse 1, 1210 Beč, Republika Austrija, registrovan je dana 04.03.2003.godine u registru kod Trgovačkog suda u Beču pod registarskim brojem FN 232521 V.

Privredni subjekt Post International pripada grupaciji Austrijske pošte-AG, koja je angažovana u djelatnosti paketne dostave, otpremanja i expres i logistik biznisa u Evropi i zemljama regiona.

Privredni subjekt Post International je u isključivom vlasništvu i kontrolisan je od strane društva Oesterreische Post Aktiengesellschaft. Dionice Oesterreische Post Aktiengesellschaft su u vlasništvu društva Oesterreische Industrie Holding AG sa 51%, dok je ostatak dionica u iznosu od 49% u vlasništvu većeg broja dioničara.

Privredni subjekt Post International nema registrovane pravne osobe na teritoriji Bosne i Hercegovine, niti posjeduje vlasničke udjele u drugim privrednim subjektima u Bosni i Hercegovini.

1.2. Privredni subjekt 24-VIP d.o.o. Sarajevo

Privredni subjekt 24-VIP d.o.o., Azići 12, Sarajevo, registrovan je dana 14.12.1998. godine u Kantonalnom sudu u Sarajevu, pod registarskim brojem 1-21399.

Predmet poslovanja privrednog subjekta 24-VIP je paketna dostava, otpravak i logistik biznis, kao i druge povezane vrste usluga na području Bosne i Hercegovine, Austrije, Slovenije, Hrvatske i Srbije.

Privredni subjekt 24-VIP je u 100% vlasništvu fizičke osobe gospodina Almira Vrpčića, (Smaje Šikala 2, Sarajevo), koji je ujedno i direktor navedenog privrednog subjekta.

Privredni subjekt 24-VIP nema vlasničkih udjela u drugim privrednim subjektima u Bosni i Hercegovini.

2. Ukupan godišnji prihod učesnika koncentracije

U smislu odredbe člana 14.stav (1) tačka a) Zakona, obaveza prijave namjere koncentracije privrednih subjekata postoji ako ostvareni ukupni godišnji prihod učesnika koncentracije, ostvaren prodajom roba i/ili usluga na svjetskom tržištu, iznosi preko 100.000.000,00 KM, po završnom računu u godini koja je prethodila koncentraciji i ako je najmanje jedan od učesnika koncentracije registrovan na teritoriji Bosne i Hercegovine.

Ukupni ostvareni godišnji prihodi privrednih subjekata, učesnika koncentracije, na dan 31.12.2007.godine, iznose:

Tabela 1

Ukupan prihod izražen u KM	Austrijske pošte- AG-group	Post International Beteiligungs GmbH	24-VIP d.o.o Sarajevo
Svjetski prihod	(..)** ¹	(..)**	-
BiH	-	-	(..)**

Za analizu podataka o ukupnom ostvarenom godišnjem prihodu privrednog subjekta Post International Beteiligungs GmbH, uzeti su podaci grupacije Austrijske pošte AG-group.

Ukupan zajednički godišnji prihod privrednih subjekata učesnika koncentracije (Tabela 1) iznosi preko 100.000.000,00 KM na svjetskom nivou, odnosno privredni subjekt Austrijske pošte AG-group je ostvario (..)**KM, dok je privredni subjekt Post International Beteiligungs GmbH ostvario (..)**KM, a privredni subjekt 24-VIP d.o.o., Sarajevo je na tržištu Bosne i Hercegovine ostvario ukupan prihod (..)** KM, po završnom računu u godini koja je prethodila koncentraciji.

Ukupan godišnji prihod učesnika koncentracije (Tabela 1) predstavlja prihod (bez poreza na dodatnu vrijednost i drugih poreza) koji se direktno odnosi na učesnike koncentracije, na svjetskom i na tržištu Bosne i Hercegovine, u smislu člana 8. h) predmetne Odluke.

Na osnovu navedenih podataka privredni subjekti, učesnici koncentracije su obavezni podnijeti Prijavu budući da su ispunili, u smislu člana 14.stav (1) tačka a) Zakona, uslov zajedničkog ukupnog godišnjeg prihoda (Tabela 1) i da najmanje jedan privredni subjekt, učesnik koncentracije je registrovan na teritoriji Bosne i Hercegovine.

2. Pravni osnov i oblik koncentracije

Pravni osnov koncentracije predstavlja Kupoprodajni ugovor za specifičnu imovinu (u daljem tekstu: Ugovor), zaključen dana 01.02.2008.godine između privrednog subjekta 24-VIP d.o.o. Sarajevo (kao prodavca), fizičke osobe, gospodina Almira Vrpčića (Smaje Šikala 2, Sarajevo) kao 100% vlasnika i privrednog subjekta Post International Beteiligungs GmbH, Republika Austrija (kao kupca).

Navedenim Ugovorom, privredni subjekt 24-VIP (kao prodavac) se obavezuje da formira novi privredni subjekt pod nazivom 24-VIP Express Logistics Services d.o.o., Azići 12, 71 000 Sarajevo (u daljem tekstu : 24-VIP Express Logistics Services), kao vlastiti privredni subjekt, i da nakon registracije istog, izvrši prenos svojih vlasničkih prava i zaposlenih radnika na novoformirani privredni subjekt, zatim da izvrši prenos i ulaganje imovine i to kao ulog u stvarima, te da zaključi sa novoosnovanim privrednim subjektom, dugoročni ugovor o zakupu poslovne zgrade i drugih specifičnih objekata na Ilidži, Azići 12, 71 000 Sarajevo.

¹ (..)**- Podaci predstavljaju poslovnu tajnu

Također Ugovorom, privredni subjekt 24-VIP se obavezuje da započne poslovne aktivnosti novoosnovanog privrednog subjekta 24-VIP Express Logistics Services, nakon čega treba da izvrši prodaju i prenos svog 100% udjela u novoosnovanom gospodarskom subjektu, na kupca, odnosno na privredni subjekt Post International.

Pravni oblik koncentracije predstavlja sticanje kontrole ili dominantnog uticaja jednog, odnosno više privrednih subjekata na drugi odnosno na više drugih privrednih subjekata ili na dijelove drugog privrednog subjekata odnosno dijelove drugih privrednih subjekata sticanjem kupovinom većine dionica ili udjela osnovnog kapitala u skladu sa članom 12.stav 1) tačka b) pod 1) Zakona.

3. Analiza relevantnog tržišta

Članom 3. Zakona i čl. 4.,5. i 6. Odluke o utvrđivanju relevantnog tržišta ("Službeni glasnik BiH", broj 18/06) određeno je relevantno tržište određenih proizvoda ili usluga koje su predmet djelovanja privrednih subjekata na relevantnom geografskom tržištu.

Konkurencijsko vijeće je utvrdilo, da je relevantno tržište usluga, učesnika koncentracije tržište dostave paketa po principu od vrata do vrata.

Relevantno geografsko tržište za ovu koncentraciju je Bosna i Hercegovina, jer se dostava paketa po principu od vrata do vrata, obavlja na cijeloj teritoriji Bosne i Hercegovine.

Slijedom navedenog, Konkurencijsko vijeće je kao relevantno tržište za koncentraciju utvrdilo tržište dostave paketa po principu od vrata do vrata na cijeloj teritoriji Bosne i Hercegovine.

Prema podacima iz Prijave, tržišni udjeli učesnika koncentracije i glavnih konkurenata na relevantnom tržištu dostave paketa po principu od vrata do vrata su:

Tabela 2

Redni broj	Konkurenti	Tržišni udio %
1.	24-VIP d.o.o. Sarajevo	24,0
2.	Rhea Express (Fed Ex)d.o.o. Sarajevo	22,0
3.	DHL International d.o.o.Sarajevo	20,0
4.	Intereuropa RTC d.o.o.Sarajevo	12,0
5.	TNT EXSPRES BOSNIA Sarajevo	14,0
6.	Ostali	8,0
	Ukupno :	100,0

Analizom podataka (Tabela 2), Konkurencijsko vijeće je utvrdilo da privredni subjekt 24-VIP na relevantnom tržištu dostave paketa po principu od vrata do vrata u Bosni i Hercegovini ostvaruje tržišni udio od 24%, dok privredni subjekt Post International ne djeluje na navedenom relevantnom tržištu.

Konkurencijsko vijeće je utvrdilo da postoji značajna konkurencija na relevantnom tržištu, što je pretpostavka djelovanja slobodne konkurencije, te nepostojanje pravnih barijera za ulazak potencijalnih konkurenata na relevantno tržište.

4. Procjena koncentracije

Konkurencijsko vijeće je nakon izvršene analize utvrdilo da provođenjem namjeravane koncentracije neće doći do promjene tržišnih udjela, učesnika koncentracije na relevantnom tržištu u Bosni i Hercegovini.

Slijedom navedenog, Konkurencijsko vijeće je utvrdilo da je tržišno učešće učesnika predmetne koncentracije znatno ispod praga od 40%, kojim se pretpostavlja da privredni subjekt može imati dominantni položaj, u smislu člana 9. Zakona.

Predmetna koncentracija mogla bi imati pozitivne efekte na relevantnom tržištu Bosne i Hercegovine, u smislu smanjenja cijena usluga, povećanja kvaliteta usluga, unošenja inovacija zbog jače finansijske pomoći, te povećanja i proširenja obima proizvodnje i usluga za klijente.

Konkurencijsko vijeće je analizom podataka, u smislu člana 17. Zakona (posebno strukture relevantnog tržišta, tržišnih udjela učesnika koncentracije i konkurenata) utvrdilo da predmetna koncentracija ne sprečava, ograničava niti narušava tržišnu konkurenciju na relevantnom tržištu dostave paketa po principu od vrata do vrata na cijeloj teritoriji Bosne i Hercegovine.

Uzimajući u obzir iznesene činjenice i podatke koji su prethodili donošenju odluke Konkurencijsko vijeće je ocijenilo koncentraciju dopuštenom, u smislu člana 18.stav (2) tačka a) Zakona, kao što je odlučeno u dispozitivu ovoga rješenja.

5. Administrativna taksa

Na ovo Rješenje Podnosilac prijave u skladu sa Odlukom o administrativnim taksama u vezi sa procesnim radnjama pred Konkurencijskim vijećem ("Službeni glasnik BiH", broj 30/06) i u skladu sa članom 2. Tarifni broj 107 stav (1) tačka d) pod 1) obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

6. Pouka o pravnom lijeku

Protiv ovog Rješenja nije dopuštena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

Predsjednik

Ibrica Lakišić